

Evening Dogri (NSD) News

19 Dec. 2025

खास खबरां

1. संसद दा स्याले आह्ला इजलास संपन्न होई गेआ ऐ। इस नतीजाकुन इजलास दरान विकसित भारत “जी राम जी बिल” सने केई महत्वपूर्ण बिलें गी पास कीता गेआ।
2. राष्ट्रपति द्रौपदी मुर्मु होरें आखेआ ऐ जे भारती प्रशासनिक सेवा दे अधिकारिएं दी भर्त्थी प्रक्रिया च ईमानदारी ते निश्ठा गी सबनें शा मती प्राथमिकता दित्ती जानी लोड़चदी। राष्ट्रपति होरें हैदराबाद च राज्य लोक सेवा आयोगें दे अध्यक्षें दे द’उं दिनें दे राश्ट्री सम्मेलन दा उद्घाटन कीता।
3. प्रधानमंत्री नरेन्द्र मोदी हुं’दा त्र’उं देशें - जार्डन, इथोपिया ते ओमान दा दौरा कामयाबी कन्नै संपन्न होई गेआ ऐ।
4. गृह मंत्री अमित शाह होरें देश भरै च इक मजबूत बंदरगाह सुरक्षा ढांचा स्थापत करने दी जरूरतै पर जोर पाया ऐ।
5. शैहरी हवाबाजी सरबन्धी मंत्रालय ने जात्तरिएं गी कोहरे करी डुआरिएं च होने आहली समस्याएं लेई ब्हाई अड्डें ते अधिकारिक प्लेटफार्में थमां ताजा जानकारी हासल करने दी सलाह जारी कीती ऐ।

<><><><><><>

Parl Adjourned

संसद दे दौनें सदनं गी बेमियादी समें तगर लेई स्थगित करी दित्ता गेआ ऐ। एहदे कन्नै गै 19एं दिनें दा स्याले आह्ला इजलास अज्ज मुक्की गेआ ऐ। पैहले लोकसभा गी बेमियादी समें लेई स्थगित कीता गेआ ते मगरा राज्यसभा गी बी स्थगित करी दित्ता गेआ। लोकसभा अध्यक्ष ओम बिरला होरें अपने समापन भाशणै च आखेआ जे सदन दी कार्यवाही तकरीबन 1 सौ 11 फीसद रेई। उ’नें आखेआ जे सदन दिआं कुल 15 बैठकां लगियां। उ’नें सदन गी बवस्थित ढंगै कन्नै चलाने च सैह्योग देने लेई सबनें सदस्यें दा धन्नवाद बी कीता। तोआई राज्यसभा दे सभापति सी.पी. राधाकृष्णन होरें अपने समापन भाशणै च आखेआ जे सदन तकरीबन 92 घैंटें चलेआ ते 121 फीसद कम्मकाज होआ। उ’नें आखेआ जे इजलास दे दरान 59 निजी विधेयक पेश कीते गे। उ’नें आखेआ जे एहू इजलास ऐतिहासिक ते लोकतांत्रिक महत्व दे मुद्दे पर उच्च गुणवत्ता आहली बैठस ते चर्चाएं लेई जानेआ जाहग। उ’नें आखेआ जे सदन ने राश्ट्री गीत “वंदे मातरम” दी 150मीं ब’रेगंड उप्पर इक बशेश चर्चा कीती, जेहदे च 82 सदस्यें हिस्सा लैता। उ’नें आखेआ जे सदन ने चुनांस सुधारें पर बी चर्चा कीती, जेहदे च

57 सदस्यें देशै दी लोकतांत्रिक प्रक्रिया गी मजबूत करने लेई अपने बेशकीमती बचार सांझे कीते। श्री राधाकृष्णन होरें कल्लै दी बैठक दे दरान विपक्षी सदस्यों आसेआ पैदा कीती गेदी रूकावट पर चैंता बुझदे होई आखेआ जे नारे लाना, पोस्टर दस्सना, चर्चा दा परता देआ'करदे मंत्री गी रोकना, कागज़ फाड़ना ते उ'नेंगी सदन दे बिच्चो-बिच्च सुट्टना, एह सब किश माझा बवहार हा।

<><><><><><>

Rijju Bills

संसदी मामलें दे मंत्री किरें रिजिजू होरें आखेआ ऐ जे संसद दे स्याले आहले इजलास दरान पास होए दे विधेयक करोड़ा-बद्धे लोकें दी ज़िंदगी बेहतर बनाने ते भारत गी इक विकसित देश बनाने च बड़ी महत्वै आहली भूमिका निभाड़न। संसद दा स्याले आहले इजलास सम्पन्न होने दे बाद संवाददाताएं गी जानकारी दि'दे होई श्री रिजिजू होरें इस इजलास गी कम्मकाज लेई बड़ा मुआफक करार दित्ता। उ'नें आखेआ जे ऐसा पैहली बारी हा जिसलै चुनावी सुधारें पर बक्खरे तौरा उप्पर चर्चा होई। उ'नें आखेआ जे केई लोकें चुनावी प्रक्रिया उप्पर सोआल पुट्टे हे, पर संसद च चुनावी सुधारें पर बैहस दे बाद सब किश साफ होई गेआ। श्री रिजिजू होरें आखेआ जे चुनावी आयोग ते चुनावी बवस्था पर आरोप लाने आहले दा सच सामने आई गेआ ऐ। राश्ट्री राजधानी खेत्तर दिल्ली च वायु प्रदूषण बारै श्री रिजिजू होरें आखेआ जे विपक्ष, खासकरियै कांग्रेस ने लोकसभा च हंगामा कीता, जेहदी वजह करी इस मामले पर चर्चा नेई होई सकी।

<><><><><><>

Prez Conf PSCs

राश्ट्रपति द्रौपदी मुर्मु होरें हैदराबाद च राज्य लोक सेवा आयोगें दे अध्यक्षें दे द'उं दिनें दे राश्ट्री सम्मेलन दा उद्घाटन कीता। इस मौके पर राश्ट्रपति होरें भारती प्रशासनिक सेवा दे अधिकारियें दी भर्ती करदे बेल्ले लोक सेवा आयोगें गी ईमानदारी ते निश्ठा गी सबनें शा उच्ची प्राथमिकता देने दी जरूरतै पर ज़ोर दित्ता। उ'नें राज्य लोक सेवा आयोगें गी भरोसेमंद सरकारी संस्थानें चा इक करार दि'दे होई राश्ट्री ते राज्य आयोगें गी नमीं उभर'दी चुनौतियें दा अंदाजा लाने ते विश्वसनीयता गी सबनें शा मता महत्व दि'दे होई अपने आपै गी तैयार करने लेई बी आखेआ।

<><><><><><>

Malaysia Armies

भारत ते मलेशिया दी सेना बश्कार सांझे फौजी अभ्यास हरिमाऊ शक्ति-2025 दा 5मां संस्करण कल राजस्थान च कामयाबी कन्नै संपन्न होई गेआ। द'उं हफ्तें दी इस सख्त सिखलाई च मुख्ख तौर पर डोगरा रेजिमेंट दे 120 जवान शामिल होए। उत्थे गै मलेशिया दी फौज दी 25मीं बटालियन दे 70 सैनिकें एह्दे च शिरकत कीती। अभ्यास दे दरान आतंकवाद रोधी अभियानें पर चेचा बल दित्ता गेआ। दौनें पक्खें दे सैनिकें अभ्यास च छापे, खोज ते अभियान सने हेलीकॉप्टर ते ड्रोन दा इस्तेमाल ते परमाणु सुरक्षा प्रणाली दे खलाफ उपायें, हेलीपैड दी सुरक्षा ते जखिमएं गी सुरक्षित बचाइयै बाहर कडुने बी शामिल हा।

<><><><><><>

PM Visit Conclude

प्रधानमंत्री नरेन्द्र मोदी हुं'दा त्र'उं देशें - जार्डन, इथोपिया ते ओमान दा दौरा कामयाबी कन्नै संपन्न होई गेआ ऐ। मोदी हुं'दे दौरे थमां इथोपिया दी सरकार ने केई सकारात्मक नतीजें दी मेद लाई दी ऐ। ध्यानजोग ऐ जे भारत, केई सारे खेत्तरें च इथोपिया गी बड़ा मता सैह्योग देआ'करदा ऐ। हुन प्रधानमंत्री मोदी हुं'दे दौरे परैन्त, इथोपिया दे लोके गी मेद ऐ जे इस सैह्योग च अग्रे केई गुणा बाद्दा दर्ज कीता जाह्ग। आकाशवाणी समाचार कन्नै गल्ल करदे होई इथोपिया दिएं महिला ते समाज कल्याण मंत्री डाक्टर एरेगोगी टेसीफाये हो'रें आखेआ ऐ जे मोदी हुं'दी इथोपिया दी जात्तरा दरान जेह्डे समझौतें उप्पर दस्तख्त कीते गे न उं'दे कन्नै, इथोपिया दिएं महिलाएं गी केई सारे लाहू हासल होडन।

<><><><><><>

PM

प्रधानमंत्री नरेन्द्र मोदी कल पच्छिम बंगाल दी जात्तरा करडन। अपनी जात्तरा दे दरान, प्रधानमंत्री नदिया जिले दे रानाघाट च राश्ट्री जरनैली सिङ्के सरबन्धी परियोजनाएं दा नीहू पत्थर रक्खडन ते उद्घाटन करडन। प्रधानमंत्री होर सभा गी संबोधित बी करडन। प्रधानमंत्री मोदी तकरीबन 3 ज्हार 200 करोड़ रुपें दिएं द'उं राश्ट्री जरनैली सिङ्के सरबन्धी परियोजनाएं दा उद्घाटन ते नीहू पत्थर रक्खडन। एहू परियोजनां कोलकाता ते सिलीगुडी बश्कार इक महत्वपूर्ण संपर्क दा कम्म करडन। इं'दे कन्नै जात्तरा दा समें द'उं घैंटें तगर घट्ट होई जाह्ग ते एह्दे'नै गड्डिएं दी आओ-जाई तेज ते सखल्ली बनग। प्रधानमंत्री कल्लै थमां शुरू होने आहले द'उं दिनें दे असम दे दौरे पर बी जाडन जिस दरान ओहू लोकप्रिय गोपीनाथ बरदोलोई अंतरराश्ट्री ब्हाई अड्डे दे नमें टर्मिनल भवन दा उद्घाटन करडन। अपनी

जात्तरा दे अखीरले ध्याड़े, श्री मोदी गुवाहाटी दे बोरागांव च स्थित शहीद स्मारक खेत्तर च ऐतिहासिक असम आंदोलन दे शहीदें गी श्रद्धांजलि अर्पित करडन। मगरा, प्रधानमंत्री होर असम वैली फर्टिलाइजर एंड केमिकल कंपनी लिमिटेड दी अमोनिया-यूरिया परियोजना दा भूमि पूजन बी करडन।

<><><><><><>

Railway Tickets

रेलवे ने स्पष्ट कीता ऐ जे डिजिटल रूप कन्नै अन-आरक्षित टिकट बुक करने आहले यात्री जांच दे बेल्ले बुकिंग लेई इस्तेमाल कीते गेदे उससै मोबाइल फोन पर टिकट दस्सी सकदे ना। हुन ऐसे यात्रियें गी टिकट प्रिंट लैने दी लोड नेई ऐ। मीडिया दिएं रिपोर्टें च इस बारै दावा करने दे बाद रेलवे ने एहू स्पष्टीकरण जारी कीता ऐ। इन्हें रिपोर्टें च दावा कीता गेआ हा जे रेलवे ने अनारक्षित रेल टिकटें दी प्रिंट कीती गेदी कॉपी कन्नै रक्खना जरूरी बनाई दिता ऐ। रिपोर्टें च इब्बी दावा कीता गेआ हा जे ऑनलाइन यां ऑफलाइन बुक कीती गेदी अनारक्षित टिकटें कन्नै यात्रा करने आहले यात्रियें गी अपनी यात्रा दे दरान टिकट कन्नै रक्खना जरूरी ऐ।

<><><><><><>

ICG - Amulya

भारती तटरक्षक बल- आई.सी.जी दी नमीं पीढ़ी दे अदम्य-श्रेणी दे तेज रफ्तार आहले गश्ती पोत, अमूल्य गी अज्ज गोआ च सेवा च शामिल कीता गेआ। रक्षा मंत्रालय ने दस्सेआ ऐ जे गोआ शिपयार्ड लिमिटेड- जी.एस.एल आसेआ स्वदेशी तौर पर तैयार, 51 मीटर लम्मे इस पोत च 60 फीसद शा मते स्वदेशी समेयान दा इस्तेमाल कीता गेदा ऐ। मंत्रालय ने आखेआ ऐ जे एहू आत्मनिर्भर भारत ते मेक इन इंडिया आहली पैहलकमिएं दे तैह्त्त रक्षा विनिर्माण च भारत दी बधदी आत्मनिर्भरता गी दर्शादा ऐ। इस पोत दा नांऽ अमूल्य रक्खेआ गेआ ऐ, जेहदा मतलब ऐ अनमुल्ला। एहू तटरक्षक बलें दी सुरक्षित, स्वच्छ ते समुंदरै दे प्रति प्रतिबद्धता दा बी प्रतीक ऐ। एहू पोत 3 हजार किलोवाॅट आहले 2 डीजल इंजनें कन्नै लैस ऐ ते एहदी बद्धोबद्ध रफ्तार 27 समुंदरी मील ते परिचालन दी हद्द इक हजार 500 समुंदरी मील दी ऐ।

<><><><><><>

Rijju Air Pollution

दिल्ली NCR च वायु प्रदूषण पर चर्चा बारे इक सोआलै दे परते च संसदीय मामलें दे मंत्री किरन रिजिजू होरें आखेया जे विपक्ष खास करियै कांग्रेस नै लोकसभा च हंगामा कीता- जिस करी इस मामले पर चर्चा नैई होई सकी।

<><><><><><>

Delhi Air Purifier

तोंआई दिल्ली सरकार- राश्ट्रीय राजधानी च बिगड़दे ब्हाऊ दे म्यार गी दिखदे होई 10 ज्हार स्कूली क्लासें च एयर प्यूरीफायर लाग। अज्ज मीडिया गी जानकारी दिंदे होई दिल्ली दे मंत्री आशीष सूद होरें आखेया जे ब्हाऊ दी गुणवत्ता च सुधार लेई सरकार आसेया कीते जा'रदे जतनें दे इक हिस्से दे तौरा पर पैहले गेड़ च एयर प्यूरीफायर लाए जागंन। उ'नें गलाया जे इस परियोजना लेई टैंडर प्रक्रिया पैहले गै शुरू करी दिती गेदी ऐ।

<><><><><><>

Putin Ukraine

रूस दे राश्ट्रपति व्लादिमीर पुतिन होरें आखेआ ऐ जे रूसी सेना यूक्रेन च अगगे बधा'रदी ऐ ते रूस अपने फौजी लक्ष्यें गी हासल करने दी बत्तै पर ऐ। ब'रे दे अखीरै आहले संवाददाता सम्मेलन च श्री पुतिन होरें आखेआ जे रूसी सैनिकें रणनीतिक पैहल हासल करी लैती ऐ ते ब'रे दे अखीरै तगर होर मती बढत हासल करडन। रूस दी सेना ने हाल दे म्हीनें च मट्टी रफ्तार कन्नै पर लगातार तरक्की कीती ऐ। राश्ट्रपति पुतिन 25एं ब'रें थमां रूस दी अगुवाई करा'रदे न ते इस मंच दा इस्तेमाल ओहू अपनी ताकत दा प्रदर्शन करने ते अपने बचारें गी स्पष्ट करने आस्तै करदे न।

<><><><><><>

HM

गृह मंत्री अमित शाह होरें अज्ज देश भरै च इक मजबूत बंदरगाह सुरक्षा ढांचा स्थापित करने दी जरूरतै पर बल दित्ता। नमीं दिल्ली च पोत ते बंदरगाह सुविधाएं दी सुरक्षा लेई समर्पित निकाय - ब्यूरो ऑफ पोर्ट सिक्योरिटी दे गठन लेई आयोजित बैठक च श्री शाह होरें निर्देश दिते जे सुरक्षा उपाएं गी जोखिम-आधारित ते चरणबद्ध ढंगै'नै लागू कीता जाना लोड़चदा ऐ। इस दरान खामियें, बपार समर्थ, थाहरें ते होरनें प्रासंगिक मानदंडें गी ध्यानै च रक्खेआ जा। मंत्रालय ने दस्सेआ जे ब्यूरो ऑफ पोर्ट सिक्योरिटी दा गठन नमें बनाए गेदे मर्चेट

शिपिंग कानून, 2025 दी दफा 13 दे तैहत इक वैधानिक निकाय दे रूपै च कीता जाहग ते इसी ब्यूरो ऑफ सिविल एविएशन सिक्योरिटी दी तर्ज उप्पर बनाया जाहग। एह ब्यूरो सुरक्षा सरबन्धी सूचनाएं दे समें उप्पर विश्लेषण, संग्रह ते आदान-प्रदान गी जकीनी बनाग। एहदे च साइबर सुरक्षा बक्खी चेचा ध्यान दित्ता जाहग ते कन्ने गै बंदरगाह दे सूचना प्रौद्योगिकी बुनियादी ढांचे गी डिजिटल खतरें थमां बचाने लेई बी इक विभाग होग।

<><><><><><>

Fog Flights Disruptions

शैहरी हवाबाजी सरबन्धी मंत्रालय ने जात्तरिएं गी कोहरे करी डुआरिएं च होने आहली समस्याएं गितै ब्हाई अड्डें ते अधिकारिक प्लेटफॉर्में थमां ताजा जानकारी हासल करदे रौहने दी सलाह जारी कीती ऐ। मंत्रालय ने आखेआ ऐ जे ओह मौसम विभाग दे कन्ने मिलियै कम्म करा'रदा ऐ ते मौसम सरबन्धी स्टीक ते अगेत्रे अंदाजें दी बिनाह उप्पर डुआरिएं दे संचालन सरबन्धी फैसले लैते जा'करदे न। किश डुआरियां, एयरलाइन कंपनिएं आसेआ रह कीती जा'रदियां न ते जात्तरिएं गी ब्हाई अड्डें तगर गैर-जरूरी जात्तरा थमां बचने लेई पैहले गै सूचित कीता जा'रदा ऐ। मंत्रालय ने आखेआ ऐ जे एयरलाइन कंपनियां, प्रभावत जात्तरिएं गी उं'दी टिकें दे पैहले वापस ते होर दुइयां लोडचदियां सुविधां देआ करदियां न।

<><><><><><>

Jaishankar

बदेश मंत्री डॉ॰ सुब्रह्मण्यम जयशंकर होरें अज्ज नमीं दिल्ली च नीदरलैण्ड्स दे बदेश मंत्री डेविड वैन वील हुं'दे कन्ने मलाटी कीती। इक सोशल मीडिया पोस्ट च श्री जयशंकर होरें आखेआ ऐ जे उं'नें दौनें मुल्खें दे बपार, रक्षा, कृषि, सेहत ते संस्कृति सने दपक्खी सैहयोग पर चर्चा कीती। डॉ॰ जयशंकर होरें आखेआ जे दौनें मुल्खें सेमीकंडक्टर, प्रतिभा गतिशीलता ते अक्षय उर्जा च नमें मौकें गी तलाशने पर बी चर्चा कीती। उं'नें आखेआ जे दौनें पक्खें आलमी सतह दे मुद्दे ते बहुपक्खी सैहयोग पर बचारें दा आदान-प्रदान कीता। डॉ॰ जयशंकर होरें आखेआ जे भारत यूरोपी संघ कन्ने अपने नेड़मे सरबन्धें लेई नीदरलैण्ड्स दे समर्थन गी मता महत्व दिंदा ऐ।

<><><><><><>

IIS Officer Dies

भारती सूचना सेवा दे साबका वरिष्ठ अधिकारी बाक्रर मिर्जा हुंदा कल चिरें रातीं दिलै दा दौरा पौने करी हैदराबाद च काल होई गेआ। ओहू 67एं बरें दे हे। उंनं आकाशवाणी, दूरदर्शन समाचार, प्रकाशन विभाग ते पत्र सूचना कार्यालय सने सूचना ते प्रसारण मंत्रालय दे बक्ख-बक्ख विभागें च कम्म कीता हा। ओहू केइएं बरें धोहड़ी आकाशवाणी हैदराबाद च प्रादेशिक समाचार एकांश दे प्रमुख बी रेह। ओहू बरे 2018 च दूरदर्शन समाचार गुवाहाटी दे ज्वाइंट डरेक्टर दे औहद्धे शा रटैर होए हे।

<><><><><><>

Search Op. Rajouri

संदिग्ध गतिविधियें दी जानकारी श्होने मगरा सुरक्षाबलें राजौरी जिले दे बक्ख-बक्ख ग्राएं च बड्डे पैमाने पर तपाशी अभियान शुरू कीता ऐ। आकाशवाणी दे जम्मू संवाददाता नै जानकारी दिती ऐ जे सेना दी 49 राश्ट्री राईफल्स ते जम्मू-कश्मीर पुलसै दी सांझी टीमै अही रातीं थन्नामंडी ते मंजाकोट सब-डिविजन मझाटै केई ग्राएं च घेराबंदी करियै तपाशी अभियान रम्भेया- अज्ज बड्डलै सूरजै दी पैहली किरण कन्नै गै एह अभियान बेहरोत गली सने होरनं इलाके च होर बी तेज होई गेया। होर ब्योरें गी अजें बलगेया जा करदा ऐ।

<><><><><><>

Airport-Bird Hazards

हवाई यात्रा गी सुरक्षित बनाने दे उद्देश्य कन्नै जम्मू-कश्मीर ते जम्मू लेई दो समीतियें दा गठन कीता ऐ। एह कमेटियां भारतीय विमान नियम -1937 दे नियम 91 तैहत प्रतिबंधित गतिविधियें दी निगरानी करोग। आकाशवाणी जम्मू दे संवाददाता दी रिपोर्ट मुजब एह समीतियां नियम 91 दी सख्ती कन्नै पालमा गी यकीनी बनाग-जेड़ा हवाई अड्डे दे कोल पखेरुएं गी आकर्षत करने आहलियें गतिविधियें उप्पर रोक लांदा ऐ- कीजे एहदे कारण हवाई जहाज दे कन्नै पखेरुएं दी खतरनाक टक्कर होई सकदी ऐ।

<><><><><><>